

KSC Jotsoma nung akhi yimsü-yimpong indang training agütsü



Kohima Science College, Jotsoma nung 'Traditional Knowledge: Cultural Heritage for Future' training nung adenterem tangokba noksa ka yangi angur.

Kohima, Rongjui/Sept. 24 (TYO): Kohima Science College Jotsoma nung September 14 nungi 22, 2023 anogotem akhi yimsü-yimpong indang training agia liasü.

Iba training nungta Kohima Science College nung tesayur aser research scholar ajak agi nisung 16 dena liasü.

'Traditional Knowledge: Cultural Heritage for the Future' nungja agütsür iba training ya Indo-German Bilateral Co-operation project 'Protection and Sustainable Management of Aquatic Resources in the North-eastern Himalayan Region of India' (NERAQ) ajanga Centre for Bio-cultural Diversity, University of Kent, United Kingdom den lungjemer ayongzüka liasü.

Akhi yimsü-yimpong indang shisatsü atema curriculum yangluba nung yaritsü asoshi iba training ya agütsü, koba course tasen ka ama agütsü aser National Education Policy (2020) den lirumedema college-i agütsür.

Iba course tasenba ya multi-disciplinary subject ka ama college indang department of

Anthropology, Botany aser Zoology ajanga agütsütsü.

Iba training nung jembidang Environmental Anthropology nung senior lecturer aser Centre for Bio-cultural Diversity, University of Kent, UK nung director Dr. Rajindra Puri-i nüburtem indang akhi yimsü-yimpong aser sobaliba tajung wazüka ayutsü, bendentsü aser lemsateptsü indang jembia liasü. Akhi mapang amshiba shisatsü indang meshidak angateta jembiba jangjatsüdang Dr. Puri-i ashiba agi, 'traditional knowledge' tetetzü tejen mesüra tasü ta ashir masü saka ibai sobaliba balala nüburtemi putu sa putu amshia aruba shisatsü takum lir.

Hopta junga agiba training yagi 'methods, ethics, variation, classification, transmission, ethno-ecology, biological knowledge aser justice' amala onüktem awajema liasü.

Iba training nung adener kati shisatsü jenti anguba ashi aser school nunga iba amala course ya agütsünung ajungtsü, ta lai shia liasü.

Iba training ya preliminary syllabus framework ka yanglua

tembanga liasü.

Kohima Science College nung iba paper ya Value Added Course (VAC) ka ama 2024 academic session nung benoktsü tebilemba lir aser semester ana nung amshitsü.

Iba training ya North Eastern Himalayan Region of India (NERAQ) nung Indo-German Bilateral Cooperation Project "Protection and Sustainable Management of Aquatic Resources indang shilem ka lir.

Indian Ministry of Environment, Forest & Climate Change (MoEFCC) ajanga Deutsche Gesellschaft für Internationale Zusammenarbeit (GIZ) den lungjemer iba project ya mapa kuma minyak, koba International Climate Initiative (IKI) kübok German Federal Ministry for the Environment, Nature Conservation, Nuclear Safety and Consumer Protection (BMUV) nungi senotsü teyari agütsür.

Region nung aquatic ecosystems wazüka ayuba aser amshiba nung tashi itshitsü asoshi iba project nukjidong lir, koba nung nisung million aika ajemdaker takum alir.

All India Vayu Sainik Camp nung Nagaland nungi cadets 12 adener



Kohima, Rongjui/Sept. 24 (TYO): Bengaluru nung September 23 nungi tenzüka October 4, 2023 tashi All India Vayu Sainik Camp agitagasi aser yangji NCC Group HQ Kohima kübok 1 Nagaland Air Squadron NCC nungi cadets 12 tashi tentagi.

Iba camp nung Drill, Skeet Shooting, 0.22 Rifle Shooting, Tent Pitching & Line Area Competition, Health & Hygiene, Air Force specific subject (Emphasis on Flying related subjects), Standard Operating Procedures of flying Virus Microlight/Zen Air Aircrafts etc

amala tetoktepba nung NCC Directorate, North Eastern Region nungi cadets 38, Senior Division (tebur) 24 aser Senior Wing (tetsür) 14-i shilem agitsü.

All India Vayu Sainik Camp ya Directorate General, NCC ajanga küm shia ayongzüka camp ka lir, kong linük nung region balala nungi NCC Directorate 17 nungi Air Wing Cadets temi shilem agir.

Iba camp alidang Air Force yimya nung Air Wing NCC unit tem indang training standards asadanger, tetoktepba tanüla adokdaksür, yimya tajung aser lenir yimya süpar, aser shilem

agiba cadets tem dak linük lungjema alitsü shisatsü aser tanüla adokdaksür.

Nagaland nungi iba camp nung shilem agiba cadets tem ya Eastern Christian College nungi Cdt Shekato Yeptho aser Cdt Priyanka Mech, Patkai Christian College nungi Cdt Lanmi Khamrang, Cdt Hikivi Aye, Cdt Ngipnon, Cdt Kenzeuyigongbe Elu, Cdt S. Ngou Shio aser Cdt Kevikelie Nyekha, aser Kohima Science College nungi Cdt Ngamlüh Yalam, Cdt Ngwaying Lungalang, Cdt Machipeuheile, Cdt Phamlong A Konyak nungterem alitsü.

Golaghat nung tetsür ka ket nungi sen lakh 15 jenjang heroin ngutet

Guwahati, Rongjui/Sept. 24

(Agencies): Assam nung Golaghat district kübok Barpathar Police temi Deobarnü temesepba mozü anema operation ka agidang temesepba mozü shibelenba nung dena alir tetsür ka apu.

Dimapur nungi Tinsukia-i aoba night bus ka meita bushiba mapang sapon talep 14 nung heroin tuozük gram 176 inoka aliba ngutet.

Pua alila ya Dimapur nung alir ta jangjaogo.

Iba mapang apuba heroin ya market nung sen lakh 15 jenjang alitsü ta asadangteta lir.

Hokulbar aonunga Golaghat district kübok kasa tesem nung police temi urea fertilizer aika pua liasü.

Osang ajanga ashiba agi, temelaba makai urea abenba osang tejangja kar nung ajemdaker police temi truck

ka soita liasü.

Aser iba truck nung urea fertilizer bags 300 temelaba mali bena aliba police temi ngutet.

Urea ya am (flour) asepa juli nung bena liasü.

Iba mozü ya ngutetba sülen police temi registration number AS-03-BC-8888 aliba truck den gari nung alir nisung apu.

Tena ya Rakib Ali aser Ranjan Bhuyan ta jangjaogo.

Iba dak sendakba nung maneni bushisüngdangba mapang lir.

Assam nung urea ya nokdanga mali, saka region nung temelaba makai iba ali temu amshiba sorkari nokdanga lir.

Sorkari urea aser DAP (di-ammonium phosphate) tem district ka nungi kati belenba nokdanga lir.

Assam Police BMI tendangba nung shilem 97.53 temang shidak lir

Guwahati, Rongjui/Sept. 24

(Agencies): Assam Police-i taoba hopta Body Mass Index (BMI) mezüngbuba tendanga liasü aser iba tetandangba nung police shilem 97.53 ajangetet.

Director General of Police (DGP) Gyanendra Pratap Singh-i iba osang ya Twitter (tangbo X ta ajar) nung sangdong aser BMI 30 mesüra tajemba alitsü asoshi police 70,161 tendangba nung 1,748 dang tali liasü ta ashi.

"Assam Police temang anema alitsü asoshi onoki meranga minyakba nung maneni yariba atema Chief Minister Himanta Biswa Sarma aser Assam sorkar dang pelar," ta Singh-i X nung zülua liasü.

Iba tetandangba ya August 16 nü Assam kübok tesem 36 nung agia liasü aser Singh ya mezüng tendanga liasü. Pai pa indang BMI ya 25 lir ta ashi, koba tarutsü nung police ajak iba standard ya lidaktsütsü meranger.

"Taküm January ita nung DGP akumdang, police ajunga dang temang shidak alitsü ni ashi.

Parnok sasa melenshitsü asoshi onoki mapang agütsü aser May ita sangdong ka agütsü," ta Singh-i Hindustan Times dang Honibarnü shia liasü.

BMI mezüng tendangba nung majangteter police 1,748 nem taruba küm January ita ano maongka ka agütsütsü aser iba mapang parnok nem medical teyari angati agütsütsü, ta pai ashi.

"Iba mapang parnok angati liver function tests, kidney function tests aser temang rangben repringtsü. Medical teyari nungdakra, onoki ajia agütsütsü," ta pai ashi.

"Assam indang Chief Minister-i melaba ama, item police ya Government Medical College tem nung temang kanga junga tendangtsü aser medical

asert nutritional support agütsütsü aser ita asem lir ano tendangtsü," ta pai X nung maneni zülua liasü.

"Tarutsü anogotem aser küm nung Assam Police temang tajungba angutsü imlar," ta pai Singh-i ashi.

Tanaben tendangba nung majangteter tem voluntary retirement agütsütsü, ta Assam DGP-i ashi. Temang tuozük majemtettsüsa temang nung timtem alirtem iba talenba küboki maittsü, ta ashi.

Taküm May ita tetenzüklen Assam Chief Minister Himanta Biswa Sarma-i police tem yi tali ajemba aser exercise maliba ajanga temang shidak maliba indang tebilemstü lemsatepa liasü aser DGP dang police tem temang anema alitsü asoshi exercise agiba nung shilem agir-magir, teti police station-i aor-maor aser duty nung mapang shidak amshir-mamshir, itemji asadangtsü shia liasü.

Police tem tajungba kumdaktsütsü nukjitong lir, ta Singh-i ashi.

"Tang nungi onoki küm shia BMI test agitsü, aser küm shia standard tajungba kumdaktsütsü. BMI standard 25 atongtsü nukjidong lir aser küm 7-8 tsüngta aji atongtsü imlar," ta pai ashi.

Shinga nema menüngdakba nung khuret magütsüner. Onoki parnok memerenshiner. Teti exercise agiba ajanga parnok temang aser tekolok-shisatsü ajangzüktsü. Parnok kibongtem tajungba akumtsü aser ajia kanga tongtipang, ta pai ashi.

Nisung ka temang tuozük 'healthy range' nung aiter asü-masü ta jangjatsü atema Body Mass Index (BMI) ya amshir. Ibai nisung ka asojen den apet temang tuozük ali asü mali ta asadangba lir. BMI yagi temang nung temo aliba sayur aser category balala nung lemsar, ta DGP Singh-isa ashi.



September 24, 2023 nü Ato kilonser, Narendra Modi-i video conferencing ajanga Chennai aser Bengaluru na densema yimti balala nung Vande Bharat train 9 tenzüksüdang tangokba noksa nung angur. Item train ajanga state 9- Rajasthan, Tamil Nadu, Telangana, Andhra Pradesh, Karnataka, Bihar, West Bengal, Kerala, Odisha, Jharkhand aser Gujarat sendaktepsü.

India-ME-Europe corridor ya shishilembaba tamendakdak akümstsü: PM

New Delhi, Rongjui/ September 24 (Agencies): Amongnü Ato kilonser, Narendra Modi-i, India-Middle East-Europe corridor ya alima nung shishilembaba tamendakdak akümstsü aser iba ya India-i mangdang yur inyakba ajanga lir ta putu aika bilemtetsü, ta ashi.

Ita shia radio ajanga linük nüburtem den jembiba 'Mann ki Baat' sentong nung jembidang Modi-i, akhidang India-i shishilembaba mapang amshiba corridor "Silk route" bilemteta jembu.

India azükarua aliba mapang aser shishilembaba tsütsü tashi tulu aliba mapang nung India-i iba corridor ya amshia liasü, ta Ato kilonseri ashi.

Tawa G20 senden aliba mapang nung India-i India-Middle East-Europe economic corridor atema benoka liasü, ta pai metetdaksü.

"India nung Chandrayaan-3 mission takok anguba sülen G20 senden takok ngua agiba ajanga linük senso ajak tepela anasü aküm. Ni nüburtem dang nungi anguba osangtem teimbaka takok ana anguba indang liasü," ta pai ashi.

India nung lenisüba alimai agizüktetogo, kechiyong India-i G20 nung African Union züngsem kümstsüdaksütet, ta pai ashi.

G20 senden ayongzuka agiba tesem 'Bharat Mandapam' ya kanga nungtugu kümogo, ta pai ashi.

September 27 anogo ya World Tourism Day anogomong lir ta shia pai, tourism ya sen ishiba indoka mapa maongka teimba agütsütsü atema lir, ta metetdaksü.

Tesüba küm ishika tsüngda India nung tenüng ajungketogo, talisa G20 senden balala amenba mapang nung

bendanger tejaoker lakh ka dak temai linük tesem balala semdanga takar sobaliba kulisüa nguogo, ta paisa metetdaksü.

Modi-i, Gurudev Rabindranath Tagore den sendaktepa aliba Santiniketan aser Karnataka nung aliba Hoysala tekülem kitem tawa 'world heritage sites', ta sangdongba ya asenok atema akhümket lir, ta metetdaksü.

Tangbo India nung world heritage sites 42 kümogo, ta paisa shisem.

October 2 nü Mahatma Gandhi asoba anogomong atongtsü anogo ishika dang lia Modi-i, G20 senden aliba mapang alima nung lenirtem aikati Gandhi memorial semdanga asür nem akhüm agütsüogo, aser ibaji ajanga tanü tashi alima nung Gandhi tesayuba/tangatetbatemji alima den tapet ta kuli sayur, ta ashi.

Nagpur nung tzünglu dak sendakba lendong nung nisung 4 süogo

Nagpur, Rongjui/ September 24 (Agencies): Nagpur yimti nung tzünglu dak sendakba lendong balala nung nisung pezü süogo; aser nisung 400 dak tema kümzükogo, ta police-i metetdaksü.

Nikongdang 2:00 ako nungi 4:00 ako tashi nung yimti nung tzünglu 90 mm arua liasü. Tang tashi nung tzümetsüng lendong nungi narongjaker aser nüpkoker school ka nung kaketshir 70 densema nisung 400 dak tema kümzükogo.

Tang tensa nung weather department-i ano maneni taruba ghonda 24 kumdanga alitsü tekümdangtsü osang metetdaksüogo.

Surendragadh nung tzümetsüng lendong nungi kinüngertemi ki ka nungi Sandhya Dhore kümzük saka tetsü arrshi küm 72, Sayabai Dhore bo mekümzükteiti asü.

Gittikhadan nung kijalir arrshi küm 70, Meerabai Kappuswamy anepongi 2:00

ako meta tzümetsüng lendong nung lar kidang asü, ta ketdangsertemi metetdaksü.

Honibar aonunga Dhantoli police station kübok kilentzü aodak tesem ka nung mejangjaba nisung ka tzü agi arakseta sür lia angu.

Ayodhya Nagar nunga anepdang 3:00 ako meta Government Medical College & Hospital kima süngo ayoker arrshi küm 52, Sanjay Shankar Gadegaokar tzümetsüng lendong nung asü.



September 24, 2023 nü Greater Noida nung Uttar Pradesh Chief Minister Yogi Adityanath, FIM Tir Jorge Viegas, Dorna Sports CEO Carmelo Ezpeleta aser UP Cabinet Minister Nand Gopal Gupta nung MotoGP Bharat Investment Summit nung adenba noksa nung angur.

Canada nung azünger India nung kaketshir tsüraburtem shisabulur

Amritsar, September 24 (Agencies): India aser Canada na tsüngda tesendaktep tamajungba akümba mapang Canada nung oa azünger India nung tsüraburtem shisabulu tenzükogo.

Tsüraburtemi pei chirnurtem atema shisabulutsüba dang masü saka kaketshirtema nendaka study mesüteter, ta osang aika angashir.

Osangbener den jembidang Balwinder Singh-i, "Onok shisabulur. Ozü jala tazünger Canada-i aoba sülen ita tenet jungogo. Osangkakettem nung linük ana (India aser Canada) tsüngda tesendaktep tamajungba akümba osangtem züngshir. Yangji ozü jala-a shisabulur aser lai nendaka study mesüteter," ta ashi.

Tawa Canada Ato kilonser, Justin Trudeau-i, Hardeep Singh Nijjar tepsetba nung India sorkar agents-i shilem agia

alitsüa akok, ta national security ketdangsertemi melung malemer, ta sangdongba sülen linük ana tesendaktep mejungi kümogo.

Osangbener den jembidang Kuldeep Kaur-i, "Ozü jala ana Canada nung oa lir, ni shisabulur. Parnok study atema Canada-i ao. Mangatettep bentettsü atema linük anaprongla sorkari inyaktüsü," ta ashi.

Brihostibarnü Shiromani Akali Dal (SAD) Tir aser MP, Sukhbir Singh Badal-i Centre sorkar dang, Canada nung India nung sensotem metsübudaktsütsü atema tekeratiba nung Canada den tesendaktep yanglushitsüla, ta mepishia liasü.

Badal-isa New Delhi nung Union Home Minister, Amit Shah ajurua pa danga iba mangatettep tekeraba nung bentettsü atema lenmang bushitsüla, ta mepishia liasü.

Congress-i state pongu nungi pezü nung takok angutsü: Rahul Gandhi



New Delhi, September 24, 2023: Amongnü New Delhi nung Pratidin Media Network of Assam-i ayongzükba 'The Conclave' sentong nung Congress lenir, Rahul Gandhi-i jembidang tangokba noksa nung angur.

New Delhi, September 24 (Agencies): Taküm küm jembir. Item ajunga ya tatembanglen state pongu nung assembly election agitsü lia Amongnü Congress lenir, Rahul Gandhi-i, Congress-i Madhya Pradesh aser Chhattisgarh na nung takok angutsü, Telangana nunga takok angutsü aser Rajasthan nung kanga atongtepa tokteptsü saka party-i takok angutsü, ta ashi.

Raul Gandhi-i, "Opposition-i longjemer inyakdar aser 2024 küm general election nung BJP süngmangtsü," ta ashi.

Pratidin Media Network of Assam-i New Delhi nung ayongzükba senden ka nung jembidang Rahul Gandhi-i, sorkari 'One Nation, One Election' benokba ya nüburtem atema tongtibang onüktem paidoktsü atema lir, ta ashi.

"India nung tongtibang onüktemji rongsen tsütsü liromemedemba, mapa manguba tebilemstsü, lower caste nüburtem, OBCs aser tribal nüburtem sendokba aser osettsüset nung jenjang kanga atuba onüktem lir. BJP-i item atemaji meinyakteter, ibayongji election ajak külemi agiba aser

India nungja melentsü atema jembir. Item ajunga ya tongtibang onüktem paidokdaksütsü nükjidong nung lir," ta pai ashi.

Taküm Rajasthan, Madhya Pradesh, Chhattisgarh, Telangana aser Mizoram state tem nung assembly elections agitsü aliba dak sendakba nung tasüngdangba ka langzüdang Gandhi-i, "Onoki Telangana nung takok angutsü, onoki atangji Madhya Pradesh nung takok angutsü aser onoki atangji Chhattisgarh nung takok angutsü. Rajasthan nung onoki atongtepa tokteptsü aser onoki akoktsü ta onoki bilemer," ta ashi.

Karnataka election nung Congress-i lesson ka angazükogo, ta shia pai, "Onoki Karnataka nung inyakbaji-onoki state atema mangdang tejangja agütsü," ta ashi.

"BJP-i media azüoker, ajisüaka onoki iba tensaji kokteter. Onok (opposition) longjemer inyaker, onok ket nung India nung nütsüng shilem 60 lir. 2024 küm (Lok Sabha election) BJP süngmangtsü," ta paisa metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 25, 2023

Ali raksaa meyutsütsüla

Asenok tanü alima nung alirtem asoshi ali ya asenok kisüng lirbo shinga malitsüba lima masü, saka asenok lir külenang ano asenok chirnur aser semchirsemnurtem aser parnok dak nungi jakzükbä chirtem alima mesama tashi tanen maka liyonga aotsü, anungji tanü asenok tajangzük anguba asaa asen aliba lima raksaa meyutsütsüla. Atangji, alima nung alir nisung shia pei bok atema dang masü saka lokti, yimten aser arogo jungdaktsütsü atema tajangzük aketba mapa ka mesüra kabo inyaksüla. Ajisüaka, tajangzük aketba mapa ajakbo tarutsü lima asoshi tajung masütsüa akok. Aji oda, nisung karbo yi ayokba ajanga tajangzük tulu ngua alitsüa akok saka parnok dang nungi alia yi ajemertem asoshibo takoksa-ang asütsüa akok. Aji dang masü saka aseni ayokba yi jemer kibong aika nung rarabangsen adoktsüa akok mesüra yi agi meseper lokti menentsütsüa akok aser yimten nem khuret bener arutsütsüa akok. Kasaji tajangzük angutsü asoshibo ozüngi memelaba mozümora 'drugs' a ayoktsü akok. Ajisüaka, item jagi asenbo tajangzük tulu angu saka nübortembo tuluka akoksa ta süra asenok atema shitakba tajangzükji kechi asütsü ? Iba amala mesükba mapatem teinyakdangbo shitak amai saka meshitak tuluka nung oa atemba mapatem aika lir. Item rongnung asenoki tajangzük angutsü atema kanga sashia inyakba mapa kaji ali mijang atuba ya ka asütsü. Tanü alima nung ali mijang ya mapa aika atema kanga nüngdaker, anungji kanga bushir, iba jagi tajangzük keta ayoker. Aji oda, asen lima nunga tesem aika nung ali mijang tua ayokba asenoki angur. Iba jagi nisung aika tajangzük ngua alitsü. Ajisüaka, ali mijang atuba agi asen tajangzük anguba den asenoki ali mijang atuba ajanga ali aser tzü raksatsüba takoksa jenjangji medemdangra, khenyongi medemdangtsü makokba takoksa bener arutsüogo ta asenoki tangua angutsü. Joko, asen lima tesem aika nung ali mejang atuba agi temeket nungbo alu ayimtsü makok kümogo aser ayong nung taküm alitsü makoker. Item takoksatemji tanü asenok ali mijang atuba ajanga takar akümba agi memenoktetsü. Tanü asenoki ali mijang atuba agi ali aser tzü raksaa yutsübaji asenoki asen chirnurtem timtemtsü lima ka yanglua toktsür asütsü. Tangarbo tarutsü küm noklang atema bilema alijak sünga süngdong tema toktsür aser ayongnutem dena memenendaktsüi merüka toktsür. Ajisüaka, asenokbo asen asoshi dang bilema inyak dang asenoka jangratema mali aser chirnurtem asoshi tzü mopong dena jungjunga menena toktsür alima nungi pilatsüsa akümtsü. Itemji jungjunga bilemdanga asenoki tebok asoshi tanü kechi inyaker, iba mapa jagi tarutsü chirnurtem makoksatsüsa kanga kümdanga inyaksü ajungshitepla. Asenokbo kanga tia tajung, asen lima tzü mopongsa tajungba, kechi lu yimdir tajung aser tapet akümer. Aji oda, asenok mapa agi tzü mopong raksatsü melen tajungba aser temerükba kümdaktsütsüsa süngjangdong tapu balala atemba nung temulung agütsüra mesüra aonsutsü lu aser shiruru metsüba mapatem nungang temulung agütsüra, item mapatem jagi asenok takar akümba den külemi asen lima tzü moponga tajungba akümtsü. Aji oda, ali mijang tua alima raksatsütsü melen kasa lu nung kozü aser akhar dong ama atemba agi nisung aika tajangzük agia angur. Aji oda, ali mijang atutsü melen süngo lu aser rubber lu ayimba ajanga kibong aika anisüngzüka aliba angur. Kasaji, ali mijang tua alima raksaa yutsütsü agibo süngdonglidong aser au aser süngküm temra, item jagibo, ashiko, ali mijang atuba nung anguba tajangzük dang nungi tuluba angutsüa akok. Itemji tanü alima nung alirtemi peisasa jungjunga shisadangtsüla aser pei inyakba mapa nung tajangzük anguba tsütsü dang mebilemi aseni inyakba ajanga tangar dang masü asüng asen chirnurtem dena akoksatsüsa kechi mapatemsa ali, item mapatemjibo meinyaksüla. Aji oda, yi aser drugs yoka tajangzük tuluka angutsü agibo jangotsü yoka tajangzük tilaka agiba nungang shitakba tajangzükjibo angutsü. Itemji, atangji, tia ajungertemi dang rajema inyaktetsü.

OLEMSABANG

Tsüngremi Sarasadem Nüktzü Akanger

~ Rev. Dr. Mar Pongener,
Executive Secretary, ABAM

Tsüngremer tejembiba asoshi pelaseta iba tayongzükba ola amangbapurtem den lemsateper. Ibai azüngtsü tenzükdang ajaki pei mulungjang nung iba ken nung aliba ojang shia yagi jembidakja züngdaktsüner. (Sarasadema züngang aser tenang, Tsüngremi ne den jembitsü aser moatsütsü). "Ammang lira sarasademang, Tsüngrem tsüngdang mepet samatsü; Anü mapu tashi mepiang, Tsüngremi langzür. Nai maneni sarasademang; Atangji Paibo angashitsü, Tamang liang, Pa anasa lir, Mepiang Tsüngremi langzütsü." (Osangtajung Ken 249).

Tsüngrem chirtemi maneni sarasademba aginüsangji aseni amangba taküm Tsüngrem ya lir. Tamang nüktzü yima sarasademba nung Tsüngremi pelar. Asen tashi maitbatem, aibelenbatem, mabensabatem, mebilemdangi jembishinüa inyaksangshibatem, taküm yimya aser o ajanga Tsüngrem mepelatsüsa inyakbatem, yirutsübatem, tesünep aser yimjung atema masü saka telemsa asoshi bilema inyakbatem, kati ka dak tatok magütsütetba, Tsüngrem tsüngdang ajemalua tila mekümtetba, item yagi Tsüngrem mepeladaktsür. Tenyar Pauli ashi; ... Aser menenpurtem rongnung ajak dang ni tongtiba lir (1 Timoti 1:15). Asenokia 'ni ama' temenenpur ka dang aochiang ta sarasademdang Tsüngrem tali pelar ta metetdi. Aseni aibenlenbatem meteta Tsüngrem nungi tatokba bushia nüktzü yima sarasademtsüla.

Asen aliba lima kanga renloka akümer. Nisunger tashitemetet aser shisatsü renloker. Asen nüngdak ajak mela mela-a nguteter aser aseni bilembatem ajak mapang tatsü tsüngdang nung inyaktetsüsa takoktsü kümdaktsür. Tepok tazüng meyutsüi chia ajemtsü rongsen moaja lir. Inyakdi sürbo mesüra jembidi sürbo sadem sadema inyaktetsüsa aser jembitetsüsa lir. Media world asünung tongteprateptsü temelaba kümdaktsüba aser asen tebilembatem mela mela-a alima den lemsatepteter. Item ajak ya Tsüngrem nungi anguba temoatsütem ta züngshia tim lenmang nung tangatetba yur libalirotetra temoatsü tuluba agi asenok süngtsütsü. Saka aseni Tsüngrem amadokra item ajak asen dak nungi agientsü Tsüngrem dak tashi lir. Anungji asen taitem asoshi nüktzü yima tatok meshia sarasademtsü Tsüngremi jembir.

Shia metetba, tangari süngmangtsüsa mesüra kenkenbo tangar aoksatsüsa jembitetba aser zülutetba, nüngdak ajak peria akaba, ki tajung nung lidaktsüba, ghari moatsüba, anogoshia asentzü sena inyakba nung tajangzük kadaktsüba, chirnur tajung moatsüba, item ajak ya Tsüngrem nungi lir. Saka asen tashi aser akaba dak temulung lema, aseni inyaktetbatem nung asüküm aser ngasangtem tanela nem kokdakja, pei sasa ulua akümtsü merangra chuba Nebukadnezzar nungi 'Yimli' pilaba ama asen daka ataloktsü menua mali ta Tsüngremi jembir. Meraket chuba ka jenjang nung yutsü saka Babilon chuba kilem nung jajaa "iba Babilon tulu koba ni chuba alidak ni yanglua lir, ya kü pei tashi tulu agi aser kü pei sentsüwangshi akhüm tulu asoshi masü no?" ta asüküm aser mezümeküm o jembi. Idakji Tsüngrem mepela aser chuba ka jenjang nungi shiruru jenjangi ludaktsüba ya asenok asoshi tangazüktsü masü no? (Dan 4:28-33). Ken mebilemdangi inyakdang aser jembidang Tsüngrem jashidaktsüra teküpokba jenjangi ludaktsütsüji Tsüngrem dak tashi lir. Aseni shia metetba aser inyaktetba nung tali ulua mebelemlü. 'Tashitemetet' yaa junger saka shia metetaka 'tangatetba' nem anidaktsübajisa tajungba aser tabensaba (Api 3:13), idakji Tsüngrem pelaba aser temoatsütem lir. Tangatetba shisatsü asoshi Tsüngrem dang mepidi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Ungma, Sept. 24, 2023: Amongnü Ungma Baptist Arogo nung pastor, Rev. Dr. Noklen Longkümer pastor mapa nungi anenba sentep sentong nung adener Aoli Arogo balala nungi pastor temi sarasademtsüdang tangokba noksa nung angur. Rev. Dr. Noklen 1984 küm NEHU nung graduate asü aser 1986 küm nungi tenzükba wadang balala nung küm aika inyaka aruogo. Pa ABAM nung Asso. Youth Secretary inyak, IBS Impur nung tesayur inyak, CTC nung visiting Professor inyak aser 2004 küm July 4 nungi Ungma Baptist Arogo nung Senior Pastor inyaka aruba sülen pastor mapa nungi anener.

KBC pur Sunday School Department Silver Jubilee among

Kohima, September 24 (TYO): September 23, 2023 nü Koinonia Baptist Church Sunday School department (KBCSS) pur küm 25 ajungba Silver Jubilee (1998-2023) mongogo, ta Koinonia media Ministry-i sangdong ka nung metetdaksü.

"Tanur ka pa aotsü lenmang nung anitetang aser pa tain akümdang iba nungjagi mepilatsü" (Apijemtsü Shin 22:6) omen nung ajemdaker Jubilee among.

Tongti o jembir Koinonia Baptist Arogo nung pastor, Rev. Zotuo Kiewhuo-i, shisatsü tajungji Tsüngrem O nungi angur aser ibaji ajanga taküm len anidaksütsüla, ta ayongzük.

Pai tanurtem dang Khrista mesüka aintsüla, ibaji ajanga dang tangari nü dak temelung lemtettsü, ta ashi.

Jubilee omen nung ajemdaker pai, tanur ka Lai O nung anitettsü atema tamendakdakji Sunday school lir; tanur ajak senso tajung kaka akümtsü atema Tsüngrem O nung anitettsüji kanga tongtibang, ta ashi.

Laishiba nung Samuel, Yoseph aser Mosa nunger atishia pai, tanur asüandang parnoki angazükba nungi parnoki len mai, anungji tanur ajakji parnok ama anitettsüla, ta ashi.

Luk 2: 52 nung ajemdaker pai, tanur kaji loktiliba, shisatsü, shi aser tanela nung liromedema anitettsüla; item ajak rongnung tanela aintsüji tongtibangba, ta ayongzük.

Tanela nung aintsü atema sarasademtsü, khuret abentsü aser samabapurtem kümzüksü atema rangloker inyaksüla, ta

pa ashi. Iba sentong ya Koinonia Prayer Centre nung Associate pastor, H Rokopra Mekro leniba nung agi, Pesocha Baptist Church Council Nhicuko Krotho Tir, Khrieketouzo Haralu-i salem osang aben aser KBCSS Senyur, Medovinuo Thong-i Lai zünga liasü.

Kasa sentong nung Beginners & Toddlers class, Junior class, Intermediate class, Primary class, Koinonia Prayer Centre Sunday school children aser Jubilee Youth choir-i ken balala aten.

Koinonia Baptist Church pastor, Medotseilieü Kiewhuo-i Jubilee nüngo kaket sayatsü, KBCSS Superintendent Belinda Kiewhuo-i tepela anküp o jembir aser Rev. Zotuo Kiewhuo-i Jubilee nüngshilong azüngja liasü.

MercyMe-i Billboard Christian Airplay nung temaba jenjang angu

September 24, 2023: Khristan kentener telok MercyMe-i ano maneni Billboard Christian Airplay aser Christian Adult Contemporary Airplay charts nung temaba jenjang tongtetogo.

'Always Only Jesus' kensep nungi parnok indang ken "To Not Worship You," ajanga Christian Airplay charts aser Christian AC Airplay charts nung temaba jenjang atong.

Billboard ajanga ashiba agi, MercyMe-i Christian Airplay charts nung 19benbuba mezüngbuba jenjang tongteter aser Christian AC Airplay charts nung tang agi 20benbuba

temaba jenjang tongteter; iba ya ajanga Khristan kenten tsütsü putiotsü tasen ka yanglutetogo.

Taküm February ita nung MercyMe indang ken 'Then Christ Came,' ajanga-a Billboard Christian Airplay aser Christian Adult Contemporary Airplay charts naprongla nung temaba jenjang tongteta liasü, ta Billboard-i metetdaksü.

1994 küm MercyMe telok ya tenteta liasü aser 2003 küm parnoki mezüng Christian Airplay aser Christian AC Airplay charts nung temaba jenjang tongteta liasü.

MercyMe telok nung züngsemtemji Nathan Cochran, Barry Graul, Bart Millard, Mike Scheuchzer, Robby Shaffer aser James Phillip Bryson nunger lir.

October ita nung parnoki "Together Again Tour" kübok tesem aika sema kentena senzütsü. November ita nunga MercyMe-i Toby Mac aser Zach Williams den külemi Georgia, Indiana, Ohio aser South Dakota nung kenten sentong 12 nung shilem agitsü.

Tesüiba küm aika tsüngda MercyMe teloki Dove Awards aser American Music Awards densema award aika nguogo.

ANOGO ABEN TSÜNGREM DEN

Sorkar Tulu

T. Ken 135:1-12

"Nenoki Kibuba sangang. Nenoki Kibuba tenüng sangang; Pa sangang, o nenok Kibuba tenzükertem!" (t.1). Ken 135 ji yamaji tenzük. Ken züluri asenok dang Halleluya ta ayimtenang ta tulubaji tesüngmangtsü, saka kechiba pai ibai ashi maneni ashir.

Mezüngbuba, asenoki Tsüngrem tenüng asangtsüla kechiaser pa tajung lir. "Nenoki Kibuba sangang kechiyong Pa tajung lir; Pa tenüngsang ken tenang; kechiyong pa taochi lir" (t.3). Pa tajung lir, aser pa ajungba asenoki mebushitettsü. Tsüngremi Pa ajungba asenok dang rongsen aser tanelaren temoatsütem nung sayur.

Tanabuba, asenoki Pa taochi asoshi Kibuba tenüng asangtsüla. "Kechiyong Pai Yakob Pei meyong ama, aser Israel Pei rongsen ama shimteta lir" (t.4). Tsüngremi meshitet dangbo rongsen masü liasü. Pai la shimmer külen, la senti aküm. Tsüngremi asenoka shimer. Yisui ashi, "Nenoki shimtet masü, saka Ni nenok shimtet" (Yn 15:16). Tsüngremi asenok Pa chirtem asütsü shimtetba ajanga Pa taochi sayu.

Tasembuba, Pa uluba asoshi asenoki Pa tenüng asangtsüla. "Kechiyong Kibuba tulu, aser asen Kibuba Tsüngrem ajak madak temaba lir" (t.5). Kechi Tsüngrem asen Tsüngrem ama lir?

Tatamsa, ken züluri asenoki asen Tsüngrem sorkar asoshi tenüng asangtsüla ta ashir. "Kotak nung süshia alima nung süshia, tzü nung süshia aser tarok ajak nung Kibubai kechisa mulunger, aji Pai inyaker" (t.6).

Na kechi tia nung lidir liang, nai Kibuba ajungba, Pa taochi, Pa uluba aser Pa sorkar asoshi nai Pa tenüng asangtsü akok. Pa nükjidong ataloktsü asoshi teyangluba ajak aser otsü ajak Pai repranger. Tsüngrem mapa inyaksü asoshi pai na amshidakjang.

Mozambique linük nung IS kiralongrartemi Khristan 11 tepset

September 24, 2023: Tan ita Mozambique linük nung Islamic State kiralongrartemi Khristan 11 tepsetogo; rara ajanga iba linük nung nisung million 1 shi tesem balala nung jenshia lir.

Cabo Delgado province kübok Naquitengue yimdak kiralongrartemi Khristan 11 tepset, ta Khristan melungtet telok- Aid to the Church in Need (ACN)-i metetdaksü.

Iba region nung missionary Friar Boaventura-i, taoba Hokolbarnü kiralongrartem iba yimtsüng jagi aruba sülen parnoki yimdak Khristantem aser Muslim nunger na bendang aser Khristantem dak injang khaloktsüdang aika asü aser aika yiru, ta metetdaksü.

Paisa, "Yim amakertemji linük nung aliba kiralongrartem lir aser parnokji IS telok den sendaktepa lir. Parnoki Khristan 11 tepset ta parnok sasa nangzükogo. Asürtemji iba dang nungjagi teimba asütsü akok aser amakdang kanga mejungi yirurtema aika lir," ta ashi.

Mapang shia kiralongrartemi yimtsüng balala amakdang Khristan aser Muslim nunger na tama shimdangba sülen ang Khristantem amaker, ta pai ashi.

tetsübu nung lir. Iba rara ya manentsüa akok, anungji sarasadem ajanga dang onok taküm litettsü," ta metetdaksü. Tawa Pemba nung tongti putir, António Juliase-i Khristantem dang Cabo Delgado nung aliba Khristantem lenmang balala ajanga yaritsü mepishia liasü.

Mozambique nung Islamist kiralongrartemi Khristan tetsürtem pua Islam yimsü dangi meyipdaksür aser karbo shi nung medemtsü atema alar ama ayur.

2017 küm nungi tenzüka Islamic kiralongrartemi mapang shia civilian amaker. Province balala nung nisung 800,000 shi tesem balala nung jenshia lir.

Mozambique nung sepaitem ochimashi, ibayongji kiralongrartem den raratsü atema linük 24-i sepaitem yoka lir, ta yaküm May ita nung report ka ajanga metetdakja liasü.

2021 küm March ita nung United States-i Muslim nütsüng teimba aliba Mozambique linük ya "Specially Designated Global Terrorists" ta sangdonga liasü.

2020 küm November ita nung Cabo Delgado province kübok Miudumbe aser Macomia district na nung IS den sendaktepa aliba kiralongrartemi tanur aser tetsür densema nisung 50 dak tema tekolak tangzüka lepseta liasü.

AO OSHI ANGAZÜKDAK: TANÜ ANGAZÜKTSÜBA OJANG



Samaru

(adj) tashi manga, shi tara (naughty)

* Samaru tanuri tsürabur kanga jashidaksür.

Samen

(n) tatar yimsüsürtem rongnung tazüing (cabinet member in village council)

* Yimtsüing putu menden nung kin shia samen kaka lir.

OLONG PAITEP # 6647

Grid for Olong Paitep # 6647 with numbers 1-16 in various cells.

TIPIEN

- 1. Anenzükdak ki - (5)
3. Asür mangyimba - (5)
5. Temlung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temlungjang tongtonglatsü atu - (5)
15. Tejen lai nung tesayur - (5)
16. Tsüingsak-mopung - (5)

LANGTSÜNGLEN

- 1. Reprangdaksü - (4)
2. ___ ur - (3)
4. Kiojen yangludak - (6)
6. ___ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüing tajemtdak - (6)
12. ___ adenshi - (4)
14. Tsünüsenbongsü adokdak - (3)

OLONG PAITEP # 6646 TELANGZÜBA

TIPIEN :

- 1. Kasa, 6. Rangben, 7. Mait, 9. Poktet, 11. Ati, 13. Atasa, 16. Rür, 17. Rajang, 20. Lanu, 24. Nüingjem, 25. Süra.

LANGTSÜNGLEN :

- 1. Khu, 2. Süjak, 3. Onük, 4. Oba, 5. Anü, 6. Ratet, 7. Mozü, 8. Ita, 10. Tar, 12. Tinu, 14. Salem, 15. Aja, 18. Anünü, 19. Taju, 21. Ano, 22. Onü, 23. Kua.

Agüja aliba noksa nung meputepi aliba 10 bushiang



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Manipur CM-i relief camps nung kaketshir nem senotsü teyari agütsü



Imphal, September 24, 2023 (Agencies): Manipur Chief Minister N Biren Singh-i Deobarnü Relief Camps nung aliba Special Scheme for Education of Children of Labour Card Holders nem senotsü teyari agütsügo.

Deobarnü Chief Minister's Secretariat nung iba sentong ya Manipur Building and Other Construction Workers' Welfare Board ajanga ayongzüka agi.

Iba mapang Chief Minister Biren-i kaketshirtem nem khen atema Rs 5,000 teyari agütsü. Iba special scheme kübok labour card tejangja aliba kibong shia aser Manipur sorkari lapoka aliba relief camps nung aliba tanurtem school azüingtsü atema Rs 5,000 agütsür.

Senotsü teyari agütsüba sülen CM N Biren Singh-i relief camps nung alirtem den ajurutepa sensaksem aser

parnok khurettem anga. Iba sentong nung Water Resources Minister Awangbow Newmai, Manipur Building and Other Construction Workers' Welfare Board Chairperson K Saratkumar Singh aser tanga ketdangsurtem aden. Manipur nung kin o kin tsüingda rara ajanga kaketshirtem dena nisung 60,000 tema relief camps balala nung jenoka lir.

APPSC exam: Arunachal nung PAJSC-i anogo 7 lungkak aittsü

Itanagar, September 24, 2023 (Agencies): Arunachal Pradesh sorkari APPSC exam agienba pusema Pan Arunachal Joint Steering Committee-i anogo tenetnü timi lungkak aittsü.

Pan Arunachal Joint Steering Committee-i Arunachal Pradesh Public Service Commission (APPSC) paper

temai adokba ken o atema tongti süa inyaker.

Külen, Parents Joint Committee-ia September 30 nü Itanagar nung APPSC exam agienba atema timi lungkak aitba sentong ka agitsü.

Telok anaprongi September 30 anogo kasa tesem nung sentong agitsü aser iba mapang

traffic nung timtem magütsütsü, tensa azüoktsü atema volunteers peria ayutsü aser loud speakers ola tashii magütsütsü nangzüktepogo.

Itanagar District Administration-i telatetba kar agütsüba kübok teloki mulungba sülen sentong agitsü temelaba agütsü.

Churachandpur nungi Aizawl tashi helicopter senzütsü

Imphal, September 24, 2023 (Agencies): Manipur kübok Churachandpur nungi Aizawl, Mizoram nung aliba Mualpui Helipad tashi Manipur Heli Service ajanga helicopter service tenzütsü.

Ministry of Home Affairs, Government of India-i Northeastern states atema Helicopter Service scheme kübok iba mapa tenzütsü.

Tsüingsang-mopung jungra iba helicopter service ya September 27, 2023 nü Imphal International Airport nungi tenzütsü.

Iba ajanga Manipur aser Mizoram tsüingda mapang tekaraba nung senzütetsü ta Directorate of Transport, Manipur-i metetdaksügo.

Imphal International Airport, Manipur

* Mr. Dinesh (Security Officer): +91 70036 11936

* Mr. Naorem Bapinchandra (Customer Service): +91 70052 03080 Churachandpur, Manipur

* Shri. T Khaiminlal Haokip, BO, SDC (Mobile: 8837420509)

* Lianzapau Samte, Office Assistant, DC's Office (Mobile: 8974452664)

Mualpui Helipad, Aizawl, Mizoram

* Ms. C. Lalrinfeli i/c Helicopter service (Mobile: 9862374153)

Churachandpur nungi Mualpui Helipad tashi ticket jenjang:

- 1. Churachandpur to Mualpui Helipad: Rs 4,500
2. Mualpui via Lengpui Airport to Lamka (Churachandpur): Rs 6,000



September 22, 2023 nü India nung mezüing atema official Apple stores ajanga iPhone models yokogo. Iba mapang Apple BKC, Mumbai aser Apple Saket, Delhi kima nung nisungtem anogo ka jelia nungi iPhone alitsü atema tarensena noktaktepa liasü. India nung iPhone tasenba mezüing alirtemji Gurgaon nungi adianu ana- Rahul aser Vivek na liasü. Iba anogo Rahul- iPhone 15 Pro aser Vivek-i iPhone 15 Pro Max aliogo.

Benin totzü ayudak mi adok, nisung aika asü

Seme-Podji, Rongjui/Sept. 24 (Agencies): Benin nung totzü ayuba tesem ka nung mi adoka apokba lendong nung nisung 35 shi asü, kong mokozü tanak anüngleni atu, ta ketdangsür temi ashi.

Iba mi ya Honibarnü Nigeria den arütsü anasa Seme-Podji jila nung ozüing alema shibelenba totzü ayudak adoka liasü, kong gari, motorbikes aser tricycle taxi tem totzü inoki arua liasü, ta yangji alirtemi ashi.

"Mi yagi yangji aliba store ya rongdok aser lendong atalokli asadangba nung tanur ka densema nisung 35 asüba jangjatet," ta Prosecutor Abdoubaki Adam-Bongle-i sangdong ka nung ashi.

"Gasoline agizükba mapang mi ya adok südi ta tenük kuli alirtemi ashi."

Ano nisung ter dak tema kanga sashia yiru aser mozüki

kidang anepalur, ta pai ashi. Social media nung prokshiba video ka nung iba lendong atalokba tesem anasa anüngleni mokozü tanak tongshi ama aser mi jangrua aliba nguogo aser meta nungi nüburtemi süngmanga repranga liasü.

Ozüing alema shibelenba totzü nungi mi ya adok, ta Benin indang Interior Minister Alassane Seidou-i ashi. Asürtem temang kanga mejungi rongdoker liasü, ta pai ashi.

Nigeria den arütsü anasa Benin nung totzü shibelenba ya kanga bolua lir. Arütsü anasa jila tem nung ozüing alema totzü atsüba, fuel dumps aser pipelines tem jateta lir, kong tang ama mi lendong aiben ajurur.

"Ni iba lendong atalokba tesem anasa alir. Iba mi ya kechi nungi adokar meshitetsü,

saka yangji gasoline warehouse tuluka lir aser iba tesem yagi gari, tricycles aser motorcycle tem anepdang nungi nikongdang tashi arur," ta yangji alir bike driver Semevo Nounagnon-i osangbener dang ashi.

Nisung aikati iba lendong atalokba asoshi aoksaba lemsatepa liasü.

"Nüburtem teyari meshi ola adokba onoki angashi. Saka mi ya kanga sashia jangrua ajanga nüburttem anasai motet," ta yagji carpenter Innocent Sidokpohuo-i ashi.

"Ni shishi aotsü asoshi kü indang motorbike nung totzü inok. Ni ayazüker metre pongu shi dang pilar apokba angashi. Ni meyipa reprangdang mokozü tanak agi sünger liasü."

Iba mi adokba jangjatsü asoshi bushisüngdang tenzükogo, ta justice ministry ajanga ashi.

Pelaba Lemsateper



ASO 18-09-1942

ASÜ 15-09-2023

Onoki teti meima aliba Ojala R. Anenla (Mokokchung Village), Sangtemla ward, shirangba mapang nungi tenzükter tasünü tashi, shirnokisa ozü dang temeim mapa, nübu, rongsen, shisatsü den sarasadem agi yariogo, nenok ajak dang kanga pelaba lemsateper. Nenok temeim mapa tulu onoki kodanga mamadoktsü. Asen teyanglur Tsüngremi nenok ajak talubosa moajangma ta ozü sarasadem.

-Temeim Kinungertem.

Israel-i Tulkarem nung Palestine nunger ana tepset

Jerusalem, Rongjui/September 24 (Agencies): West Bank kübok Tulkarem yimti nung refuge camp ka meita aoba mapang Isrel nunger sepaitemi Palestine nunger ana tepsetogo, ta health ketdangsürtemi metetdaksü.

Palestinian Ministry of Health-i ashiba agi, tebur ana; Asid Abu Ali, 21, and Abdulrahman Abu Daghsh, 32 na Deobarnü Israel nunger sepaitemi meita aoba mapang tepsetogo aser iba den camp nung infrastructure tema kanga mejungi raksago.

Refuge camp amakba dak sendakba nung Israeli military-i ashiba agi, sepaitem Nour Shams refugee camp-i telungpu command centre ka aser ki ka nung bomb bendena yua aliba facility ka raksatsütsü atema ao.

Military-i ashiba agi, engineering units-i lenmang tezülen rema tokja aliba bomb

aika pokdaksü aser Palestine nunger telungpurtemi parnok dak injang khaloktsüba den bomb poklokja liasü aser ibayongji Israel nunger sepaitemi parnok dak meyiper injang khaloktsütsüsa aküm.

Iba ita tetenzüklen Israel nunger sepaitemi Nour Shams refugee camp meita aoba mapang arishi küm 21 tain Ayed Samih Khaled Abu Harb khaseta liasü.

Israel-i tawa asendenshir West Bank meita aruda aser talisa anütoktiplen tesem balala meita arudar. Ita 18 tashi parnoki tesem balala maka arudar aser ashiba agi, Palestinian resistance fighters tem raktoktsü aser tarutsü nung parnoki Israel amaktsü aliba nokdangtsü asoshi iba jenjang agir.

Israel indang army-i West Bank amokbanga arudar, kong Palestine nunger million asem

shi küm 56 shi lia arudar.

July ita Israel-i West Bank kanga sashia maka liasü. Iba mapang parnoki Jenin refugee camp nung Palestine nunger 12 tepset aser nisung 100 shi yiruja liasü.

Tesem balala meita aoba ajanga rartepba tajemba küma aoba kecha temaitsü mali aser iba ajanga Palestinian Authority tashi mait kümdaktsüogo, shirnoki Israeli-occupied West Bank nung tesem kar yimsüsüa arudar.

United Nations-i ashiba agi, parnoki 2006 nü nungi asürtem züngdanga aruba sülen 2023 küm ya Palestine nunger atema tamajungtiba küm lir.

Taküm küm tenzükter Israel-i Palestine nunger 200 dak tema tepsetogo, ta Health Ministry sangdong ka ajanga metetdaksü. Kasa mapang nung Palestine nungertemia Israel nunger 35 tepsetogo.

US-i visa nokdangba nung onok timtem mali: Bangladesh FM



AK Abdul Momen

Dhaka, Rongjui/Sept. 24 (Agencies): Taruba küm Bangladesh nung general elections ochishia aser shidak agidaktsütsü merangba nung election inyakyim nung timtem agütsüba yong US-i tenüing magütsüba Dhaka ketdangsür kar indang visa nokdangba nung onok timtem kecha mali, ta Bangladesh indang foreign minister-i ashi.

"US ya democracy lir, aser onoka kasa lir," ta AK Abdul Momen-i osangbener dang Honibarnü ashi.

"Alima nung tashi tulu aliba linük ka ama parnoki dangar madak par tashi amshitetsü, saka onok timtem mali, kechiaser onoki election tajungtiba nung agitsü meteta lir," ta pai ashi aser kasaji Ato Kilonser Sheikh Hasina-ia tamalen shia liasü.

Bangladesh nung democratic election inyakyim nung tetsükdaksü mesüra timtem agütsüba atema Bangladesh nunger nisung kar nem visa tenokdangba agütsür, ta US Department of State ajanga Bresthibarnü sangdonga liasü.

State Department indang odongtar Matthew Miller-i sangdong agütsüba nung, item nisungtem ya ozüing amshirtem, ruling party aser political opposition nungi lir aser parnok kinungertema United States-i aittsü metemsü akumtsü, ta shia lir.

State Department ajanga nisung shinga tenünga mesangdong, kechiaser US law

kübok visa record tem temai madoktsür, ta Bangladesh nung aliba US Embassy indang odongtar Bryan Schiller-i ashi.

Nisung million 160 aliba South Asian linük nung national election tajungba nung agidaktsüner ta jembia arur ano ita pezü tejakdang US Secretary of State Antony Blinken-ia visa nokdangtsü tekumtangtsü shir tang iba osang ya angashir.

Iba mapangjia Bangladesh indang foreign ministry-i election shidak agitsü shia liasü. Ajisüaka Hasina sorkari maneni political opposition aser activists tem dak tenük yoker aser September 14 nüa human rights activists ana tepuokdaki yoka liasü.

Tesüsa national elections ana - 2014 aser 2018 - agiba nunga ochi mashi mapa inyakba aser opposition temi shilem magiba liasü. Ato Kilonser Hasina'er Awami League party ajanga election anaprong nung takok angu aser parnoki tim masüba mapa meinyak ta ashi.

Bangladesh nung democratic election inyakyim nung tetsükdaksü agütsüba puteter nem tarutsü nung US visa mangutsü, ta US State Department-i tekimtangtsü ashi.

Ozü party lenir aser züngsem temi visa tenokdangba atema shisabolu mali, kechiaser parnok timbai iba yimchiyimjung linük nung dang liner, ta Minister Momen-i ashi.

"Yangi vote agütsütsüpuria tsüboa mali, kechiaser parnok US-i aotsü tebilemba mali."

Kosovo nung police ketdangsür ka tepset

Pristina, Rongjui/September 24 (Agencies): Serbia anasa Kosovo kübok tesem ka nung khatepba sülen police ketdangsür ka tepset aser ano ka yirua liasü.

Kosovo Ato Kilonser Albin Kurti-i ashiba agi, Leposavic nung Banjska yimtsüing amakba nung prangbong tesashi bener "professionals" tem densema liasü.

May ita local election ka nung mangatetep adoka lendong tulu atalokba sülen Kosovo nung tensa mejungi lir.

EU-i teyongtsüi ia mangatetep bentetsütsü merangba bangdaka lir.

Kosovo-i 2008 küm parnok nüjiso anguba sangdong ajisüaka Serbia aser parnok nem teyari agütsüba China aser Russia nati iba ya magizüker.

Serbia nunger aikati iba tesem ya par linük poktetdak ta züngshir. Ajisüaka Kosovo nung

nütsüing yongsük million 1.8 nungi shilem 92 Albania nunger aser shilem 6 Serbia nunger lir.

Deobarnü khatepba ya anepdang 3:00 ako nung ataloka liasü. Serbia den arrtsü nung Banjska tesem nung tenokdangba ka agütsür aliba indang bushisüngdangtsü atema police tem aoba sülen khatepba liasü.

Police ketdangsürtem ya hand grenades aser shoulder-fired missiles tem dena amshia tesem balala nungi maka liasü, ta parnoki ashi.

Belgrade-i teyari agüja ozü linük amaker, ta Ato Kilonser Kurti-i ashiba den police amakertem aser item nisungtem nem tetuyuba agütsürtem merenshitsu, ta shisem.

Kosovo tir Vjosa Osmani-i ashiba agi, police tem ya Serbia nunger ozüing alema nokdakba teloktemi sentong yanglur amak, koba temzüng ozüing aser

Republic of Kosovo sovereignty anema lir.

Laisa, Serbia-i yimjak nung Kosovo anemba aitsüogo aser Kosovo nung temzüng ozüing amenokshitsu atema linük tembartem ayongzuka liasü.

Osmani-i nüburttem dang longjemer alitsü mepeshiba den Kosovo police dak tamang akaba lemsatepa liasü.

May ita northern Kosovo nung Serbia nungertemi local election nung shilem magitsü telemtetba agiba sülen Serbia nunger timba aliba tesemtem nung Albania nunger mayor tem amenoktsü aser iba ajanga mepetmesü tenzuka liasü.

Election agiba sülen Zvecan jila nung iba mepetmesü bentetsü atema Nato-i Kosovo-i sepai 700 talila yoka liasü.

Lendong nung Serbia nunger longkak aiter 50 dak tema aser Nato sepai 30 shi yirua liasü.

NSFA-i ayonga 1buba open powerlifting tetoktepba agiogo



Kohima, Rongjui/September 24 (TYO): The Nagaland Strongman & Fitness Association (NSFA)-i ayongzüka Honibarnü mezüngbuba Open Powerlifting tetoktepba asayaogo.

Ajak senteper Assam nungi asayar ana densema iba tetoktepba nung asayar 32-i weight category balala pongu nung shilem agia liasü. Iba tetoktepba ya Kohima kübok Old NST area nung asaya liasü.

NSFA tir Keduovilie Zumu-i ashiba agi, gym tem timba küma aoba aser fitness asoshi tejangraba tali akümba dak temulungdang yur Association-i, powerlifting tetoktepba nung

shilem agitsü atema bodybuilder tem nem sabanga ka agütsünüa liasü.

Paisa, powerlifting asaya ya Olympics nung züngoksema mali saka Commonwealth Games, Asian Games aser National Games nungbo züngoksema lir, anungji category balala nung takok angutsü atema Naga nunger asoshia lenmang sadema lapoka lir, ta ashi.

Tetoktepba nung squat, bench press aser deadlift nung tetokteperi ajak senteper weight kwi ajungketter aji densema liasü.

Category balala nung takok angurtem:

59 Kg: 1st - Alo Thung (235 Kgs), 2nd - Ranjit Timung (222 Kgs)

66 Kg: 1st - Kuvemuvi Ringa (442 Kgs), 2nd - Nganshung (425 Kgs)

74 Kg: 1st - Imliyanger Air (495 Kgs), 2nd - Zhopao Movi (480 Kgs)

83 Kg: 1st - Daniel Lotha (577 Kgs), 2nd - Pelesetso Khate (575 Kgs)

93 Kg: 1st - Kekhriesetuo (610 Kgs)

105 Kg: 1st - Tsuknungakum (582 Kgs), 2nd - Rükukhoto (580 Kgs)

105+ Kg: 1st - Venuzo Dawhuo (685 Kgs), 2nd - Sedevizo Keretsü (580 Kgs).

Asian Games: India nunger asayartemi rowing & shooting nung medal angu

Rongjui/September 24, 2023 (Agencies): Hangzhou, China nung tang asaya aliba Asian Games nung Deobarnü India nunger asayartemi tebur lightweight double sculls rowing event aser tetsür 10m air rifle team asaya nung silver medal nungo.

Tebur lightweight double sculls rowing nung Arjun Lal Jat aser Arvind Singh nati shilem agi aser tenati silver medal ngua liasü.

Deobarnü Lal Jat aser Singh nati 06:28:18 nung alizüng tongteta iba asayamung nung India atema mezüngbuba medal

ngua liasü. Tetsür 10m air rifle team nung Ramita, Mehuli Ghosh aser Ashi Chouskey nungeri linük atema tanabuba medal ngua liasü.

Par asem senteper point 1886.0 ngua silver medal angu aser India team atema tanabuba medal ngua liasü.

Deobarnüsa India nunger rowers Babu Lal Yadav aser Lekh Ram nati tebur tarep asaya nung bronze medal ka angu aser shooter Ramita-ia tetsür 10m Air Rifle event nung bronze medal ka ngua liasü.

Tang tashi nung medal tally nung China team temaba jenjang nung lir. Parnoki gold medal trok ngua lir. Kasa mapang nung Hong Kong-ia gold medal ka ngua parnok tanabuba nung lir aser India-i medal pezü ngua tang tasembuba nung lir. Uzbekistan-ia India den kasa medal ngua lir aser parnok India sülen pezübuba nung lir.

Asayamung lapokba sülen mezüngbuba anogo India nunger asayartemi medal ishika ngua iba asayamung kanga junga tenzüko.

Dravid'er jabaso Samit Karnataka squad nung züngoksemogo



Rongjui/September 24, 2023 (Agencies): India Cricket team head coach Rahul Dravid'er jabaso Samit, 2023 Vinoo Mankad Trophy atema Karnataka nungi asayar 15 shimba nung densema lir.

Iba U-19 asayamung ya October 12 nungi 20 tashi Hyderabad nung ayongzüka asayatsü renema lir.

Samit shiba asayamung tenzüksü lia arishi küm 18 ajungtsü, pa taoba mapang Karnataka tenüng nungi U14 asayamungtem nung shilem agiogo, ajisüaka tang mezüngbuba U-19 asayamung ka nung shilem agitsü lir.

Kasa mapang nung Dravid'er jabaso tanubosang Anvay ya state indang U14

cricket team captain lir.

Dravid-a state tenüng nungi senior jenjang nung dang masü saka U-15, U-17 aser U-19 jenjang nung asayaogo aser pa 1991/92 season nung mezüngbuba Ranji asayamung nung shilem agia liasü.

Ajisüaka India head coach-i par jabaso tambusang Vinoo Mankad Trophy nung asayaba merprangshitsü, kechiyong iba mapang kasa nung India team 2023 ODI World Cup nung asaya alitsü, koba October 5 nungi tenzüksü.

Dravid aser pai aniba team ya tang Australia den ODI asayaba mapang lir. Mezüngbuba ODI asaya nung Rahul-i aniba team yagi Mohali nung wicket pongu agi Australia koka parnok 1-0 agi tejangdang lir.

Tebur open volleyball asayamung thinener

Kohima, Rongjui/September 24 (TYO): Runguzumi Youth Association (RYA)-i sangdong ka ajanga ashiba agi, Men's Open Volleyball Championship 2023 koba September 30 nü nungi tenzüka Phek district kübok Chozuba nung asayatsü liasü, iba asayamung ya October 2-i thinenogo.

Raffle draw-a October 2 nü asütsü, ta parnokisa metetdaksü.

Asayamung ayongertemi ashiba agi, September 30 nü CBCC Prayer Day ayongzüker aliba ajanga iba asayamung thinenogo.

Iba asayamung nung takok anguba team nem senpet sen 30,000, runners-up nem 20,000 aser semi-finalist ana nem

5000 agütsütsü.

Maneni best setter aser best spiker nema senpet sen 2000 agütsütsü.

Entry form ya Vethitalu Shop Chozuba Town (8787818219), Ate Shop Chetheba (8118949752), M/S L.R. Computer Hardware, Phek Town (6009245320), Excel Shop, Main Town Pfutsero, Multiplex Kohima; (7005453009) nung angutsü.

Asayamung nung shilem agitsüba taa 2000 asütsü aser form benoktsü atema tatembangbuba anogo September 29 asütsü. Osang tejangjaba agitsü atema item number: 8787530189/8787800833 nung t o n g t e p r a t e p t s ü metetdaksüogo.

Maria Sakkari-i WTA Guadalajara open kokogo



Rongjui/September 24, 2023 (Agencies): WTA title tanabuba abentsü atema küm pezü tashi ataba sülen second-seeded asayar Maria Sakkari-i 7-5, 6-3 agi Caroline Dolehide koka 1000 level Guadalajara Open kokogo.

Greece tsür Sakkari ya world rankings nung tekububa nung lir aser lai 2019 küm Rabat nung WTA asayamung ka akokba sülen final trok tashi nung takok monguteti liasü, kong taoba küm Guadalajara final nung la America tsür Jessica Pegula-i tsükdaksüba densema lir.

Taküm WTA 1000 asayamung ka nung set ka nung danga tamakok mongui asayamung akokba mezüngbuba asayar akümba sülen Sakkari-i la indang coach dang kanga pelaba lemsatop aser ashiba agi tena tanabuba asayamung akoktsü atema küm pezü tashi ataogo. Sakkari aser la coach na küm pongububa inyaksangshia arudar.

"Ni kodanga asayamung ka makoktsü aser ni ya asayamung

ka dang koker top 5 nung aliba asayar ka lir ta ashiba amala o tamajung aika onoki angashiogo, koba paitoktsü atema kanga tasak liasü, anungji iba hopta ni takok ngutetba atema kanga pelar," ta Sakkari-i ashi.

Dolehide shiba tang jenjang 111buba nung lir la tang mezüngbuba la indang career nung WTA final ka tonga asaya liasü.

Asaya tetenzüklen serve break südaksür aliba nungi meyipa atur Dolehide 5-4 agi tejangdang aküm.

Ajisüaka Sakkari-i taruba asaya ana akok aser 6-5 agi la tejangdang aküm. Iba sülen taruba game nung 0-30 agi tesülen aliba nungi meyipa atur Sakkari-i mezüngbuba set akok. Tanabuba set nung Sakkari 3-2 agi tejangdang ser tenzük. Game tenetbuba nung Sakkari 40-0 agi tejangdang liasü saka Dolehide la menepa atua la nem timtem agütsü ajisüaka lai ace ka oa iba game akok.

Iba sülen lai maneni Dolehide indang serve break süa tanabuba set ayong ayonga koka liasü.

BILEMDANGANG

"Taoba mapa tamakoktem agi na atsüdaka teyudaksü."